



**Geschichte der geistlichen Stiftungen, der adlichen
Familien, so wie der Städte und Burgen der Mark
Brandenburg**

[Urkunden-Sammlung für die Orts- und spezielle Landesgeschichte]

Riedel, Adolph Friedrich

Berlin, 1861

LXXXI. Die Brüder Heinrich und Hermann Paschedag verkaufen dem
Kloster Marienpforte und verlassen vor den Mecklenb. Erbherren das Dorf
Bentz, am 6. October 1404.

Nutzungsbedingungen

[urn:nbn:de:hbz:466:1-55721](https://nbn-resolving.org/urn:nbn:de:hbz:466:1-55721)

houen vnde houen, gebuwet vnde vngebuwet, myt wesen, hoyflaghen, weyden, Buffchen, ftruken, myt zeen, watern, vleten, hulsen, wonyngen, thunen vnde myt aller tobehoryngen, alle to den Stedeken vnde am dorpe to Boyfenborch hebben tobehoret, nyctes utgenomen, ane dat ouerste richte vnde den denft, scolen besitten vnde Bruken Theyn Jare al umme funder allen hinder vnser, vnser eruen, vnser voghede, houetluden, ambachtluden, vnde aller der Jenen, de vin vnfen willen don vnde laten willen, vnde willen se bynne der tyt myt macht dar by beholden. Vnde wan de Theyn Jar syn vmme gekomen, wille wy danne dat Stedeken vnde dat dorp Boyfenborch wedder hebben, so wille wy vnde scolen den armen hilgen in gode Clofter Junewrouwen to Boyfenborch gheuen in godes ere vnde vor eren schaden hondert Schock Bemefcher groffen, edder Ses hondert mark vynkenogen Stetinescher penninghe. To merer bekentnisse vnde tuchnisse differ vorfcreuen dyng, So hebbe wy Bugflaff vnde Barnym, veddern, van vnser hrodere wegene vnde van vnser wegene vnse Ingefegele myt witleop an dessen breff laten henghen, de gegheuen ys to Boyfenborch an den Jaren godes dusent veerhondert in dem drydden Jare, am dage des hilgen apostels sunte Bartholomeus. Hir ouer syn gewesen vnse getruwen her Reymer vos, vnde her Zacharias haze, Riddere, her hinrik, prouest to Gramfowe, Syuard Klutfowe, knape, Otto hoppe, Ghereke Brokman, Ratman vnde borger van premflove, Johannes ffabri, vnse houeferyver, vnde meer de louen werdich syn.

LXXXI. Die Brüder Heinrich und Hermann Paschedag verkaufen dem Kloster Marienpforte und verlassen vor den Mecklenb. Erbherren das Dorf Benz, am 6. October 1404.

In godes namen, amen. Vor allen guden cristen luden, de dissen breev seen, horen edder lesen, Bekenne ik, her hinrik, ridder, vnde hermen, broder, gheheten de paschedaghe, dat wy mid guden willen vnde mid vorbedachtem mude, vnde nach rade vnser frunt hebben vorkoft dat dorp to beentz, dat vnser rechten vader erue was, den erwerdeggen iunewrouwen des closters to boyzenborch vullenkomen vnde al med al finer tobehoringhe, acker, holte, water, pacht, bede, richte, denft, kerceleen, vnde alle rechte, overste vnde sydest, dar nicht vt to nemnde, dat an deme vorbenomeden kope hinderik edder schedelik moghe wesen; vnde wy vnde vnse rechte eruen, dede nu syn vnde to komen moghen, willen vnde scolen en eyne were wesen vor alle tosprake geystlekes edder werlekes, vnde vryen em de twelf mark ierliker bede, de vnse erfheren van mekelenborch vp dat dorp hadden, vnde hebben em dat vorbenomede dorp vorlaten vor vnfen rechten erfheren, vnde vorlatent den vorbenomede iuncvrouwen, also vorghefchreven is, med craft disses breues also, dat wy vnde vnse rechten eruen vns dar nicht mer in teen willen edder scolen, dat em dar hynderik edder schedelik moghe wesen. Des to tughe vnde to hogher bewaringhe, dat wy alle de vorghefcreuen sthucke willen vnde scolen stede vnde vast holden ane ienegherleye arghelift invindinghe edder hulperede, dar disse bref mochte mede ghebroken werden, so hebbe wy vorbenomeden brode Hinrik ridder vnde herme, gheheten de paschedaghe, vnser beyder Inghesegel laten henghen witleken an dissen ieghenwerdeggen open breef, de gegheuen vnde

gheschreuen is in vſeme houe to ſchoneuelde, na goddes gebort verteynhundert Jar dar na in deme verden iare, des mondaghes vor ſente Dyonifius daghe des hilghen merteleres.

LXXXII. Herzog Ulrich von Mecklenburg vertignet für ſich und ſeinen Bruder Johann dem Kloſter Marienſpforte das Dorf Bentz, am 6. Dezember 1404.

Wy Johan vnde Ulrik, brodere, van godes gnaden hertoghen to Mekelenborch, to Stargarde vnde to Roztock heren, bekennen vnde betughen in diſſem ieghenwerdeghen opene breue vor allen criſten luden, de diſſen bref ſeen, horen vnde leſen, dat vor vns ſyn ghewefen vnſe leuen ghetruwen her hinrik, ridder, vnde hermen, knecht, brodere, gheheten de paſchedaghe, vnde hebben vorlaten dat dorp to Bentze mit alme rechte vnde tobehoringhe, alſo ere elderen vnde ſe dat hebben beſeten van older tyd erſleken vnde vredeken, den erwerdeghen iuncvrouwen des cloſters to boyzenborch, de nu ſyn vnde tokomen moghen. Unde wy ulrik, hertoghe vorbenomed, hebben mit macht vnſers broders, hertoghe Johan vorbenomed, den vorbenomeden iuncvrouwen des cloſters to boyzenborch dat vorbenomede dorp beentz ghelegghen vnde voreghent, vnde voreghenen vnde lyghen en dat mit kraft diſſes breues mit alme rechte hogheft vnde ſydeft an hant vnde an hals, mit denſte, mit pacht vnde bede, akker, holte, water, weyde vnde mit aller tobehoringhe, mit vryheit, mit aller nuttecheyt, alſo dat vorbenomede dorp beentz lich vnde belegghen is in aller ſyner ſcheydinge, it ſy benomed in diſſem breue edder vnbenomed, vmme vnſer elderen vnde vnſer ſelen willen. Vnde de vorbenomeden iuncvrouwen, de nu ſyn vnde tokomen moghen des cloſters to boyzenborch, ſcholen vnſer elderen vnde vnſer ſelen darvor dencken ſalig dechniſſe to ewygher tyd. Darvor ſcolen ſe dat vorbenomede dorp beentz vry voreghent beholden to ewygher tyd, alſo dat wy vnde vnſe eruen vnde vnſe weldeghen dar nicht mer ſcholen inteen. Al diſſe vorſchreue ſtucke toſamende vnde en iewelik beſunderen loue wy vlrik vor vns vnde vor vnſen broder, hertoghe Johann vorbenomed, vnde vor vnſe eruen, den vorbenomeden iuncvrouwen des cloſters to boyzenborch, de nu ſint vnde tokomen mogen, an guden truwen ſtede vnd vaſt to holdene, ſunder ienegerleye argheliſt, hulperede, invindinghe, dar diſſe breff mochte mede ghebroken werden. To merer betuginghe vnde bekantniſſe ſo hebbe wy vlrik, hertoghe vorbenomed, van vnſes leuen broders wegghen, her Johannes, hertoghen to Mekelenborch, vorbenomed van vnſer beyder wegghen vnſe Inghelſeghel mit wytſcop laten hengghen von diſſen bref, des wy nu bruken van vnſer beyder wegghen, hir an deme lande to Stargarde. Gheuen vnde ſcreuen to olden ſtargarde up vnſem flote, na criſti vnſes heren gebord verteynhundert iar darna an dem verden jare in ſunte Nycolaus daghe des hilghen byſcoppes. Tughe diſſer dingh ſint ghewefen vnſe leuen truwen wedeghe van plote, vnſer marſcalk, vnde her Johan, proueft, vnſe houefcriuer, her mathyas bumefter, perrer to lyghen, vnde her brunnigh, perrer to Rutenbergh, ghereke wulf vnde hinrik warborgh vnde mer gude bedderuer lude, de tughe vnde louen werd ſyn.